

Gitta critica per il Seco cun ses portal per fegls uffizials

Nova intervenziun da cusseglier naziunal Martin Candinas

DA CLAUDIA CADRUVI / ANR

■ **Il stadi na dastga betg concurrerenzar l'economia privata, ma gist gliez fetschia il secretariat da stadi per economia (Seco), crititgescha Martin Candinas.** Cun ses portal per fegls uffizials ruineschia il Seco investiziuns da privats e pericliteschia plazzas da lavur, scriva il cusseglier naziunal en sia interpellaziun inoltrada ier. Il portal electronic concurrenzescha tranter auter la puschida da la Somedia che tira la curta sch' ils chantuns na scrivan betg pli ora lur incaricas per fegls uffizials.

Il Seco ha bajegià si cun «SHAB – Amtsblattportal» ina plattafurma da publicaziun electronica e porscha quella er als chantuns. «En Svizra devi gia plattafurmas paregliablas dad interpresas privatas avant ch' il Seco è cumparì sin il martgà», scriva Candinas. Ils chantuns possian uss dentant surdar la publicaziun da lur fegls uffizials directamain al Seco senza scriver ora las incumbensas. «In tal proceder exlauda purschiders privats.»

Il Seco saja finanzia entras taglias – in ulteriur dischavantatg per purschiders privats. Il Seco haja preschentà sia plattafurma avant dus onns als chanceliers chantunals. Lezza giada hajan ins anc menziunà ch' i manchia ina basa legala



Cusseglier naziunal Martin Candinas (pcd GR) crititgescha il Secretariat da stadi per economia.

per ina tala collavuraziun cun ils chantuns.

Stenschentar privats

Ina plattafurma da l'economia privata è per exempel Diam che vegn duvrà dapi il 2016 dal chantun Grischun per sias publicaziuns. Diam existevia gia dapi dus onns cura ch' il Seco saja entrà cun ses portal en il martgà, stat scrit en l'interpellaziun. Sviluppà questa plattafurma ha l'interpresa da medias Somedia. Ils chantuns Son Gagl ed Argovia han scrit ora tenor las reglas da submitziun lur fegls uffizials e la Somedia haja la finala survegñi l'incumbensa. Basilea-Citad, Basilea-Champagna ed il chantun Berna n'hajan dentant betg scrit ora l'incumbensa ed hajan surdà directamain al Seco la publicaziun dals fegls uffizials. «L'economia privata vegn uschia stgatschada ord il martgà», crititgescha Candinas. Ins ruineschia investiziuns e pericliteschia plazzas da lavur. En quest connex giavischa il cusseglier naziunal respostas dal cussegl federal. Tranter auter sch' i saja propi l'incumbensa dal Seco da sviluppar servetschs ch' interpresas privatas pon porscher gist uschè bain. Ed era sch' il Seco ch' è finanzia cun daners da taglia dastgia concurrerenzar privats e sch' igl existia en il fratemp ina basa legala per in tal servetsch.